

Sarajevo, 04.08.2016.

Saopštenje za javnost – Koalicija "Pod lupom"

Odredbe Izbornog zakona BiH prekršilo 16 izbornih komisija

Prema informacijama 42 dugoročna posmatrača Koalicije „Pod lupom“ 16 gradskih i opštinskih izbornih komisija nije odredilo broj i vrstu biračkih mjesta do zakonom propisanog roka, odnosno 29. jula, za što su Izbornim zakonom BiH predviđene novčane kazne u rasponu od 200 do 1.000 KM.

Različite aktivnosti političkih subjekata koje se mogu protumačiti kao izborna kampanja primijećene su u 24 opštine, iako kampanja zvanično počinje 2. septembra. Radi se o oglašavanju na društvenim mrežama, organizovanju proslava za birače, javnim tribinama, uređivanju javnih površina, dijeljenju letaka i sl.

Konkretni primjeri kršenja odredbi Izbornog zakona BiH primijećeni su u Velikoj Kladaši u kojoj nezavisni kandidat za načelnika opštine Adem Pajazetović još od aprila provodi kampanju i vrši podjelu poklona građanima, a isti se moraju potpisati i dati lične podatke da su primili poklon. SDP Stari Grad Sarajevo vrši promociju kandidata plaćenim oglašavanjem na društvenim mrežama, dok SDA Stari Grad Sarajevo vrši podjelu humanitarne pomoći građanima. U Istočnom Novom Sarajevu Socijalistička partija je održala javnu tribinu na kojoj je predstavila kanididate i nudila obećanja za predstojeće lokalne izbore, dok je kandidat za načelnika grada Trebinje ispred SNSD-a Luka Petrović već održao javno predavljanje pred više stotina građana i pozvao građane da glasaju za njega. Ovo su samo neki od primjera koje su posmatrači Koalicije zabilježili tokom monitoringa predizbornog perioda i Koalicija "Pod lupom" želi skrenuti pažnju političkim subjektima da će dostaviti Centralnoj izbornoj komisiji BiH do danas zabilježene i buduće primjere zloupotrebe i kršenja Izbornog zakona BiH prije zvaničnog početka izborne kampanje.

Velika većina lokalnih (gradskih i opštinskih) izbornih komisija provodi adekvatne pripreme za održavanje izbora. Iako su izbori raspisani 4. maja, izborne komisije Krupa na Uni i Modriča još uvijek nemaju potpun sastav, a čak devet lokalnih izbornih komisija nije ispoštovalo zakonsku odredbu o 40% zastupljenosti manje zastupljenog pola (Zvornik, Bratunac, Bosansko Grahovo, Novo Sarajevo, Gradačac, Kotor Varoš, Čelinac, Lopare, Petrovac). Sa problemima u radu se susreće 17 komisija, koje navode da nemaju adekvatne prostorije za rad i opremu, a od kojih se 5 komisija susreće i sa finansijskim problemima koji mogu uticati na kvalitet provođenja izbora. 140 izbornih komisija je donijelo poslovnike o radu, no zabrinjava činjenica da gotovo trećina sjednica održanih u periodu od 25-31.07. nije bila adekvatno najavljena čime je umanjena transparentnost u njihovom radu. Pozitivan napredak ostvaren je imenovanjem 55/142 sekretara komisija. Iako ovo nije zakonska obaveza, Koalicija vjeruje da će ova imenovanja znatno pripomoći boljoj organizaciji i provođenju izbora.

Regionalni koordinatori i dugoročni posmatrači Koalicije su od raspisivanja izbora 4. maja 2016. do danas ostvarili kontakt sa 142 opštinske i gradske izborne komisije, te informisali 102 regionalna ogranka političkih subjekata i 63 policijske uprave o kampanji posmatranja Lokalnih izbora 2016.

Pored posmatranja predizbornog, izbornog i postizbornog perioda, Koalicija će vršiti i monitoring medija i izbornih kampanja političkih subjekata.

Koalicija za slobodne i poštene izbore - Pod lupom i ovom prilikom poziva građanke i građane BiH da se prijave za nestranačke posmatrače izbornog dana, kao i da prijave eventualne izborne nepravilnosti. To mogu učiniti putem internet stranice podlupom.org ili besplatnim pozivom na broj 080 05 05 05. Građani i građanke se za posmatrače izbornog dana mogu prijaviti do 7. septembra 2016. godine.

Za sve dodatne informacije molimo Vas da se obratite koordinatorici za odnose s javnošću Koalicije „Pod lupom“ Jovani Kljajić putem elektronske pošte pr@podlupom.org ili telefona 033 268 160 i 065 252 016.